



---

## EXERCICIO DE APOIO – UNIDADE 9-

---

### **CUESTIÓN:**

1. Cales son as diferentes técnicas –signos verbais- que hai para expresar a voz dos personaxes?
2. Que diferenza hai entre espazo escénico e espazo dramático?
3. Que estrutura externa presenta o texto teatral?
4. Que son as didascalias?
5. Explica a diferenza entre luz dramática e descritiva.
6. Define traxedia e comedia e dá un exemplo de cada unha delas.

## SOLUCIÓNS:

### 1. Cales son as diferentes técnicas –signos verbais- que hai para expresar a voz dos personaxes?

Existen diferentes técnicas para expresar a voz dos personaxes en escena:

- **Diálogo:** un personaxe conversa con outro/s.
- **Monólogo:** un dos personaxes en escena fala só.
- **Á parte:** o personaxe di en voz baixa unhas breves palabras dirixidas ao público (buscando a súa complicidade), como se se lle escapasen.
- **O coro:** vén ser unha especie de personaxe colectivo con múltiples funcións: conciencia o recordo do personaxe que fala. Adiviño que predi os acontecementos que van acontecer; narrador con reflexións filosóficas morais e adivinatorias.

### 2. Que diferenza hai entre espazo escénico e espazo dramático?

Espazo escénico	Espazo dramático
Lugar real onde se representa a acción: no teatro, nun escenario, cuns decorados, cunha iluminación... Este espazo escénico debe representar o espazo dramático.	Lugar imaxinario onde supostamente acontece a acción: un cuarto dunha vivenda, un castelo, un xardín...

### 3. Que estrutura externa presenta o texto teatral?

O texto teatral presenta a seguinte **estrutura externa**...

- **ACTOS:** Habitualmente son tres e corresponden a outros tantos momentos na estrutura interna da obra:
  - Presentación.
  - Nó ou clímax.
  - Desenlace.
- **CADROS:** son as porcións de acción que transcorren nun mesmo espazo escénico ou decorado. Cambia o cadro cambia o decorado.
- **ESCENAS:** son as partes en que se divide un acto ou un cadro as cales interveñen os mesmos personaxes. Cando un personaxe entra ou sae hai un cambio de escena.

#### 4. Que son as didascalias?

Son as indicacións para a posta en escena da obra, a súa finalidade é servir de guía para a escenificación ou axudar ao lector a visualizar mentalmente a súa representación.

As didascalias informan:

- As características do espazo escénico (decorados, iluminación,...)
- A xestualización e entoación dos actores e actrices.
- A dirección da súa conversa, é dicir, a quen se dirixen cando falan.
- As entradas e saídas dos personaxes.

**Lembremos** que hai didascalias que son verdadeiras obras de escrita literaria e van máis alá do puramente metateatral, é dicir non son só indicacións obxectivas da posta en escena. Este é o caso que atoparemos no *Hamlet* de **Cunqueiro**.

#### XORNADA PRIMEIRA

*Unha sala no castelo de Elsinor. Paredes núas, afumadas. Onde non, pousa o mofo verde, que brilla en esmeralda ou ouro vello cando o roza a raiola do sol ou a luz das lámpadas. Á dereita, unha grande escaleira de pedra que rube á Torre dos Esperteiros. A esquerda, unha chimenea: no fogar arde un lume canso. Altas bóvedas e podentes trabes de Carballo. Unha única fiestra, ó fondo, aberta sobre a néboa da mañá. Aquí e acolá, nas paredes, fiteiras e saeteiras. A sala é terrea. Non se escoltan os pasos da xente.*

*O coro baixa despacio polas escaleiras. Un fato de xentes escursas, sen idade nin sexo, que visten roupas pardais, ou da color do fume e do mofo, que arrimadas ás paredes se confuden con elas. A parte do Coro vana declamando, como por turno, as xentes estas, adiantándose do mestro grupo para dicila, e voltando presto ó anónimo. Voces, as do Coro, súpetas unhas, apaixonadas outras, outras graves e reflexivas.*

*Don Hamlet, Álvaro Cunqueiro*

Comparémola coa simplicidade da de **Miguel Anxo Murado**.

*Noutro punto do escenario: a entrada da pousada. Está só o taberneiro limpando as mesas. Entra un home con aspecto de avogado, con quevedos. Trae a súa equipaxe que son unhas bolsas e un traxe nun percheiro. Deixa a equipaxe á entrada e diríxese ao taberneiro.*

**Miguel Anxo Murado, A grande noite de Fiz.**

## 5. Explica a diferenza entre luz dramática e descritiva.

Para a iluminación durante as representacións úsanse os reflectores, cos que se iluminan os actores, e os instrumentos de proxección, que serven para imitar elementos da natureza. Así temos dous tipos de luz que atenden a funcións diferentes:

- **Luz descritiva:** serve para indicar ao espectador, por convención, é a realizada con xogos lumínicos de focos, un momento do día ou da noite. Tamén serve para amosar algún elemento lumínico que non se pode incorporar ao escenario, por iso o substitúe. **Exemplo:** *abrente, solpor, faros dun coche, etc.*
- **Luz dramática:** serve para sinalar puntos de liña de atención. **Exemplo:** *canón de luz enfocado a cara dun só personaxe.*

## 6. Define traxedia e comedia e dá un exemplo de cada unha delas.

TRAXEDIA	COMEDIA
<p>Xénero dramático que moitas veces remata coa morte do protagonista. Os personaxes son seres superiores que viven conflictivamente a confrontación entre o seu destino e a realidade. Consta de exposición, desenvolvemento e desenlace ao longo de <b>tres ou cinco actos</b>.</p> <p>Caracterízase pola creación de temas lendarios, mitolóxicos ou históricos nos que se presentan grandes interrogantes do ser humano, emprega unha linguaxe culta e o seu obxectivo único é producir unha catarse ou purificación das propias emocións.</p>	<p>Ten a mesma estrutura formal ca traxedia, pero os personaxes son de condición inferior á desta. Presenta unha visión non problemática das imperfeccións humanas (trata de imitar a realidade cotiá da xente normal). <b>A súa finalidade é facer rir.</b></p> <p>A comedia é un xogo alegre que busca o divertimento mediante a presentación dunha serie de conflitos supostos, situacións falsas ou personaxes ridículos. Moi pronto converteuse no reflexo teatral da vida cotiá. Os personaxes da comedia son, polo xeral, individuos correntes.</p> <p>Nalgunhas destas obras o que máis interesa é o desenvolvemento dunha complicada trama que dá lugar a equívocos (comedia de enredo); outras céntranse no carácter do protagonista; por último están as comedias de costumes.</p>
<i>Hostia</i> , <b>Armando Cotarelo Valledor.</b>	<i>O achado do castro</i> , <b>Manuel Núñez Singala.</b>